

四庫全書

經部

欽定四庫全書

經部

儀禮集編卷十八

詳校官監察御史臣周元良

給事中臣溫常綬覆勘

總校官進士臣楊懋珩

校對官中書臣張曾效

謄錄監生臣孫鳳翔

欽定四庫全書

儀禮集編卷十八

龍里縣知縣盛世佐撰

聘禮第八之四

聘遭喪入竟則遂之

註曰遭喪主國君薨也入竟則遂國君以國為體士既請事已入竟矣關人未告則反

教氏曰入竟則遂為其已承主國君之命也

不郊勞

註曰子未君也

敖氏曰聘不主於嗣君使人郊勞則嫌也不郊勞則夫人亦不使下大夫勞矣然則大夫請行者其以賓入與

不筵几

註曰致命不於廟就尸柩於殯宮又不神之

疏曰鬼神所在曰廟則殯宮亦得為廟則設几筵亦

可矣但始死不忍異於生不神之故於殯傍無几筵也  
曾子問云君薨世子生告殯殯東有几筵者鄭云  
明繼體也

教氏曰此亦受於廟不筵几者變於君親受之禮也  
世佐案當以註疏為正筵几所以依神也於殯宮  
則不設之臣子之心不忍以神禮待始薨者也必  
受於殯宮者有二義一則大夫方為君持服不可  
以入廟攝行禮二則所聘者故君也雖薨而聘君

之命不可以不達故就殯宮致命焉在使者為不廢命在主國為不死其君也敖說非

不禮賓

註曰喪降事也

敖氏曰禮當作醴君喪則使大夫受故不醴賓以其非正主也

世佐案行聘享訖而以醴酒禮賓君受聘於廟之禮也今受者非君受之所又不在廟其不行此

禮也宜哉

主人畢歸禮

註曰賓所飲食不可廢也禮謂饗餼饗食

賓唯饗餼之受

註曰受正不受加也

敖氏曰唯受饗餼者以主人雖不遭喪亦歸之饗餼  
故於此受之而不辭不受饗食者則以主人有喪不  
宜饗食已故雖致之亦不受也受饗餼則殮亦受可

知殮饗餼之細也

世佐案受饗餼者以其所歸皆行者所必需也饗食之屬所以禮已則辭之而已

不賄不禮玉不贈

註曰喪殺禮為之不備

敖氏曰賄與禮玉主君以報聘君者也今主君薨難乎其為辭故闕之贈者所以答私覲遭喪則不覲故主國亦不宜贈



張氏曰賄謂束紡禮玉謂以束帛乘皮報享贈謂賓出至郊以物贈之

世佐案周禮掌客職云凡禮賓客札喪殺禮謂此也此以禮玉與賄贈並言則其為禮名而非以玉報享明矣

遭夫人世子之喪君不受使大夫受於廟其他如遭君喪

註曰夫人世子死君為喪主使大夫受聘禮不以凶

接吉也其他謂禮所降

疏曰服問云君所主夫人妻大子適婦

敖氏曰此大夫廟受之禮即記所云者是也遭君喪之禮凡所降者各有其義此亦遭喪也故因其禮而用之耳其義則或合或否而不能盡同

世佐案亦受於廟者君不敢以己之私喪而廢公事也使大夫者大夫為君之妻長子之服差輕可以接吉也其他謂自不郊勞以下亦因喪而殺也

受於廟而不筵几不禮賓者辟正主也下記云若君不見使大夫受者謂君有疾病及他哀慘之事非遭夫人世子喪之比也其受王之儀雖同而服式則異彼時皮弁服此則長衣練冠如下文所云也教氏一之非

遭喪將命於大夫主人長衣練冠以受

註曰遭喪謂主國君薨夫人世子死也此三者皆大夫攝主人長衣素純布衣也去衾易冠不以純凶接

純吉也吉時在裏為中衣中衣長衣繼皆掩尺表之  
曰深衣純袂寸半耳君喪不言使大夫受子未君無  
使臣義也

疏曰此長衣與深衣同布但袖長素純為異去衰易  
冠者謂脫去斬衰之服而著長衣脫去六升九升之  
冠而著練冠也聘是純吉禮為君三升衰裳六升冠  
為夫人世子六升衰裳九升冠是純凶禮麻經與屨  
不易直去衰易冠而已故云不以純凶接純吉長衣

中衣深夜三者皆用朝服十五升布六幅分為十二幅而連衣裳袖與純緣則異玉藻云長中繼揜尺鄭註云其為長衣中衣則繼袂掩一尺此鄭云吉時之服純袂寸半者純為衣裳之側袂袖為口緣皆寸半表裏共三寸深夜目錄云深夜連衣裳而純以綵純素曰長衣有表則謂之中衣以此言之則長衣中衣皆用素純若然臣為君斬為夫人世子期輕重不同今受鄰國之聘禮同用長衣練冠者但接鄰國者禮

不可以純凶故權制此服略為一節耳向來所釋皆是主君始薨假令君薨踰年嗣子即位鄰國朝聘以吉禮受之於廟故成十七年經書邾子貜且卒十八年邾宣公來朝傳云即位而來見踰年可以朝他國他國來朝亦得以吉禮受之於廟矣雖踰年而未葬則不得朝人人來朝已亦使人受之於廟於夫人世子亦然以其本為死者來故也

教氏曰此遭喪亦謂遭主君喪也主人即大夫文互

見耳主君喪而受之之服如此則夫人世子之喪其亦皮弁服以受與

世佐案此遭喪亦謂遭夫人世子之喪也主人長衣練冠者以其廟受聘禮不可純用凶服而大夫新有期喪又不可以吉服將事故制為此服以通之居喪得易服者以其期服差輕而接鄰國禮重也若主國君薨致命於殯宮則主人當凶服以受蓋三年之喪既成服無時而可釋者服重而聘輕

也書顧命成王崩康王以冕服受顧命見羣臣儒者猶或非之豈受聘禮而顧可去斬衰之服脫六升之冠以從之與若既奠踰年則鄰國之來聘者為嗣君也自當受之於廟其服亦深衣練冠與踰年而未奠其禮與始奠同夫人世子之喪既奠則使大夫以吉禮受之於廟矣

右遭喪

世佐案文六年左傳云季文子將聘於晉使求遭



喪之禮以行即謂是也其儀節與常聘異者蓋多矣經不能具也然因是而推之則其降殺變易之數亦略可覩矣

聘君若薨於後入竟則遂

註曰既接於主國君也

敖氏曰後謂使者既行之後也云入竟則遂是未入竟則反而奔喪矣君薨則其國使人告使者而不反之以其行或有遠近故也

赴者未至則哭於巷衰於館

註曰未至謂赴告主國君者也哭於巷者哭於巷門未可為位也衰於館未可以凶服出見人其聘享之事自若吉也

疏曰本國遭喪赴者有兩使一使告聘者一使告主國赴主國之使未至是以未可為位受人吊禮

教氏曰赴告喪者之稱也其哭也亦為位奔喪曰諸臣在他國為位而哭亦謂此時也

世佐案哭於巷別於私喪也巷哭則不為位可知  
奔喪所云赴者既至之禮也亦容有私事出疆及  
聘而未入竟者教氏引之非又案赴主國君者猶  
未至而使臣得先聞之者以其國當遣急使告之  
使得未入竟而反故聞在赴者至之前也

受禮不受饗食

世佐案禮當作醴謂以醴酒飲賓也醴與饗食皆  
主君所以禮已而有受有不受者以醴與聘享同

日不可不終其事且其義不尚味故得受之至於饗食則唯主於飲食而已已既聞赴自不當復與教云雖歸之猶不受是也饗食在行聘後不一日而言於赴者至之上者容赴者之至有遲速且以見斯禮也赴者雖未至亦在所必辭也不言饗餼者以其所歸如米禾薪芻為行者所必需其勢不得不受而方歡粥水飲之時則鼎饌之屬又無所用之受否不一故空其文也註以受禮為受饗餼

非

赴者至則衰而出

註曰禮為鄰國闕於是可以凶服將事也

疏曰凶服將事謂主人所歸禮則賓可以凶服受之  
其正行聘享則著吉服矣故雜記云執玉不麻是也  
教氏曰但云衰而出則其出也非為聘事矣以此見  
赴者之至例在聘日之後也

張氏曰禮為鄰國闕襄公二十三年傳語謂鄰國有

喪為之微樂也

世佐案教說得之蓋使者出竟在君未薨之前則赴者之至自宜後於聘且聘者君生時所命也將命而後發其凶問亦事之次也若然則聘時吉服之義明矣

唯稍受之

註曰稍廩食也

疏曰禮君行師從卿行旅從者既多不可闕於稍

食案周禮每云稍事皆謂米廩以其稍稍給之故謂  
米廩為稍

敖氏曰稍謂漿飲乘禽之屬以其稍稍給之故謂之  
稍漿人職云共賓客之稍禮記云甸而稍宰夫始歸  
乘禽亦可見矣

郝氏曰稍受牲牢之類則不受

世佐案稍謂米禾薪芻之屬掌客云賓客有喪唯  
芻稍之受是也敖以漿飲乘禽當之非漿飲乘禽

非有喪者所宜受也上云不受饗食則饗食之外  
容有可受者此云唯稍受之則稍外更無一受者  
矣此赴者至與未至之別也

歸執圭復命於殯升自西階不升堂

註曰復命於殯者臣子之於君父存亡同

疏曰案禮記奔父母之喪升自西階此復命於殯亦  
升自西階法生時出必告反必面

教氏曰亦衰而執圭也升自西階而不升堂告殯之



禮然也是時上介亦執璋立於其左

郝氏曰使臣歸國復命於殯如事生也升自西階殯在西階也不升堂臣見君於堂下也

世佐案教云衰而執圭是也或泥雜記執玉不麻之文謂復命畢而後反喪服非上經云衰而出在他國尚可以凶服將事豈於殯前獨不可乎且既成服固無可釋之理也復命之辭見上文殯在路寢西階上使者釋辭畢北面坐奠圭於殯南席上

降宰亦喪服升自西階北面坐取圭降自西階以東是時上介執璋立於階下少西

子即位不哭

註曰將有告請之事宜清靜也不言世子者君薨也諸臣待之亦皆如朝夕哭位

疏曰案公羊傳君存稱世子君薨稱子某既葬稱子踰年稱君奔喪云奔父之喪在家者待之皆如朝夕哭位

教氏曰子者諸侯在喪之稱子位在阼階上不哭者子臣同

辯復命如聘

註曰自陳幣至於上介以公賜告無勞

張氏曰徧復命於殯如聘禮之常但不代君作勞辭耳

世佐案辯復命謂自受上介璋致命以下是也云如聘亦大畧言之耳其實賄幣禮玉皆不受則不

告賜禮所不受者言亦不及之無勞無獻皆其異者也每告則升璋則奠之殯南禮幣則以授上介上介奠於故處

子臣皆哭

註曰使者既復命子與羣臣皆哭

世佐案臣謂羣臣在朝夕哭位者於是乃哭者因使者之歸而感君親之不見也於其哭也使者與介皆出

與介入北鄉哭

註曰北鄉哭新至別於朝夕

疏曰復命之時介在幣南北面去殯遠復命訖除去幣賓更與介前入近殯北鄉哭朝夕哭位在阼階下

西面今賓介新至故於殯前北鄉也

從句讀  
節木

敖氏曰云入者既復命則出至是乃更入蓋復命奔喪宜異其節也奔喪云奔喪者非主人入門左中庭北面哭然則使介此時之哭亦在西方之中庭而西

上與

世佐案與介入之義教得之疏誤

出袒括髮

註曰悲哀變於外臣也

張氏曰子奔喪則袒括髮於殯東矣

入門右即位踊

註曰從臣位自哭至踊如奔喪禮

疏曰奔喪云袒括髮於西階東即位踊襲經於序東

此門外袒括髮入門右即位踊亦當襲紅於序東故  
鄭云自哭至踊如奔喪禮也

右聘君薨

若有私喪則哭於館衰而居不饗食

註曰私喪謂其父母哭於館衰而居不敢以私喪自  
聞於主國凶服於君之吉使春秋傳曰大夫以君命  
出聞喪徐行而不反

疏曰衰而居謂服衰居館行聘享則皮弁吉服大夫

以下春秋宣八年公羊傳文何氏註聞大喪而不反重君命也徐行者為君當使人追代之以此言之使雖未出國境聞父母之喪遂行不敢以私廢王事明至彼所使之國雖聞父母之喪不反可知

敖氏曰云哭於館者嫌其不敢發哀於主人之廡也昔曾子與客立於門側其徒趨而出曾子曰爾將何之曰吾父死將出哭於巷曾子曰反哭於爾次曾子北面而弔焉正此意也不饗食謂主君饗食已則不



往也其致之則斯受之是亦異於其君之喪

世佐案唯云不饗食則其他皆受之矣牲牢乘禽之屬亦得受之者雜記云三年之喪如或遺之酒肉則受之必三辭主人衰經而受之如君命則不敢辭受而薦之是也

歸使衆介先衰而從之

註曰已有齊斬之服不忍顯然趨於往來其在道路使介居前歸又請反命已猶徐行隨之君納之乃朝

服既反命出公門釋服哭而歸其他如奔喪之禮吉時道路深衣

疏曰既以朝服反命出門去朝服還服吉時深衣三日成服乃去之

敖氏曰經但見其未及郊之禮耳若君既許其反命則朝服而帥衆介以行也

世佐案奔喪之禮有二一是平時聞赴遂歸在道不及成服則服深衣素委貌至家三哭之明日乃

喪服杖於序東所謂三日成服也一是以君命出使不得遽歸則成服於外至家固已喪服不俟三日所謂若不得行則成服而後行也此經所陳即成服而后行之事然則出公門即反喪服矣疏乃引未成服而奔喪者之禮以釋之非

右賓有私喪

賓入竟而死遂也主人為之具而殯

註曰具謂始死至殯所當用

疏曰若未入竟即反來殯非謂殯於館斂於棺而已

從句讀

節本

朱子曰案周禮註疏云權殯於館此疏非是

敖氏曰殯即其館而殯之也尸未得歸故權殯於此云殯則不以造朝矣

姜氏曰遂謂遂使事也主人謂主國執事者

介攝其命

註曰為致聘享之命也初時上介接聞命

君弔介為主人

註曰雖有臣子親姻猶不為主人以介與賓並命於君尊也

疏曰古者賓聘家臣適子皆從行是以延陵季子聘於齊其子死葬於贏博之間

敖氏曰凡諸侯弔於異國之臣君為之主此時其君不在故介為主人受主君之弔以此時惟介為尊故也君弔蓋皮弁服禮諸侯弔於異國之臣皮弁錫衰

主人未喪服則君亦不錫衰不錫衰則惟皮弁服矣  
此賓死於外雖已殯主人蓋未喪服也介為主則袒  
免喪服記曰朋友皆在他邦袒免謂此類也凡諸侯  
弔主人必免

主人歸禮幣必以用

註曰當中奠贈諸喪具之用不必如賓禮

郝氏曰主君歸禮幣取供喪用不必如賓周禮掌客  
賓客死致禮以喪用是也

世佐案此謂歸於賓者也

介受賓禮無辭也

註曰介受主君賓已之禮無所辭也有賓喪嫌具辭之

郝氏曰介代受賓禮直受之無復如賓存禮辭所以明代也

世佐案此謂歸於介者也介既攝命行禮則主國即以待賓之禮待介介皆受惟無辭為異無辭者

辟正賓也辭謂自郊勞至於贈賄賓皆禮辭而后受之

不饗食

敖氏曰與私喪同亦致則受之

郝氏曰主君饗食介皆不就以飲食為悅也

張氏曰前經云上介壹食壹饗

世佐案此亦謂壹食再饗張說誤

歸介復命柩止於門外



註曰門外大門外也必以樞造朝達其忠心

疏曰國君有三門臯應路又有三朝內朝在路寢庭  
正朝在路門外應門外無朝外朝應在臯門外經直  
云止於門外無入門之言明知止於大門外外朝之  
上

姜氏曰門外治朝之門外也疏謂國君三朝則是謂  
三朝內外之位則非詳考天子有五門臯庫雉應路  
而諸侯合臯庫為一門雉應為一門路門又為一門

此固國君之三門也至三朝因乎三門外朝在臯門  
內即庫門也治朝為正朝在應門內即雉門也內朝  
在路門內即寢門也而乃謂應門外無朝外朝在臯  
門外也何哉疏所以致此弊者意以樞不應直造正  
朝其所造者乃外朝而經云止於門外則外朝又必  
在第一門臯門之外也不知其說絕無根據與朝制  
既不相合而於經義亦多未明玩本經賓介始受命  
於治朝則合反命於治朝且賓死介將命以賓樞造

於鄰邦之治朝則賓死介復命又合造於本國之治朝其止於門外者造於治朝之門外則固造於朝矣析言之有門外門內之分統言之朝門即朝也樞止朝門而介將命禮合下當如是若如疏家之意殆疑舉樞朝堂之為非而遂以滋此弊也不亦率哉

世佐案疏臯應當作庫雉說見上經云止於門外而註云造朝者朝是公所之總名故大門外亦得謂之朝也疏必以外朝釋之似泥姜以謂治朝之

門外亦非又案周禮朝士註鄭司農云王有五門  
外曰臯門二曰雉門三曰庫門四曰應門五曰路  
門路門一曰畢門外朝在路門外內朝在路門內  
康成則謂庫門在雉門外外朝在庫門之外臯門  
之內天子諸侯皆有三朝外朝一內朝二內朝之  
在路門內者或謂之燕朝二說不同今以後鄭為  
正以其說推之諸侯之內朝一在路門內即燕朝  
也一在路門外雉門內所謂治朝也其外朝則當

在雉門之外庫門之內其朝位在庭中有樹處非別有屋宇也疏謂外朝在臯門外固非姜氏辦之亦未明故復論之

介卒復命出奉柩送之君弔卒殯

註曰卒殯成節乃去

疏曰卒復命謂復命訖送之謂送至賓之家殯喪之

大節卒殯而後君與介乃去也

從集說  
節本

敖氏曰卒殯謂既奠乃去也大夫之喪自外歸載柩

以輜車舉柩由阼階升即適所殯

世佐案大夫之喪至自外之禮見雜記殯在兩楹之間

若大夫介卒亦如之

註曰不言上介者小聘上介士也

張氏曰亦如之謂在聘國及反本國諸事

士介死為之棺斂之

註曰不具他衣物也自以時服也

君不弔焉

註曰主國君使人弔不親往

若賓死未將命則既斂於棺造於朝介將命

註曰未將命請俟間之後也以柩造朝以已至朝志  
在達君命

敖氏曰此朝謂大門外也介將命於廟如賓禮既則  
歸而殯之於館

若介死歸復命唯上介造於朝

敖氏曰於賓言止於門外於上介云造於朝文互見也

若介死雖士介賓既復命往卒殯乃歸

註曰往謂送柩

敖氏曰賓送上介已見於大夫介卒亦如之之中故惟主士介而言也不言君弔其在既殯之後乎是亦降於賓與上介也

右賓介死



小聘曰問不享有獻不及夫人主人不筵几不禮而不升不郊勞

註曰記貶於聘所以為小也獻私獻也而不猶覲也

疏曰不禮者聘訖不以齊酒禮賓而不升者謂私覲庭中受之不升堂

敖氏曰受於廡而不筵几禮差輕也禮亦當作醴凡受禮而設筵几乃醴賓此不筵几故不醴賓亦相因而然也而不升以其為下大夫也其禮如大聘之上

介特初覲不與士介同入為異耳郊勞乃使臣之禮  
故言於君禮之後云獻繼不享而言謂聘君之獻也  
經記於大聘皆不言聘君有獻於主君及夫人而此  
於小聘乃以有獻不及夫人為異亦未詳

郝氏曰獻隨意獻國所有不筵几不行禮於廟也

世佐案享與獻皆聘君之所以遺主君也而其別  
有二享必以玉帛庭實獻則隨其國之所有而已  
一也享君與夫人皆有之獻君而已不及夫人二

也大聘享而不獻小聘獻而不享輕重之差也註  
以獻爲私獻非教氏知獻之出於聘君而不知即  
所以代享宜其疑而不能析也云不筵几則亦在  
廟可知受大聘於太祖廟受小聘益於親廟與  
其禮如爲介三介

註曰如爲介如爲大聘上介

張氏曰禮主國待賓之禮謂饗餼食饗之屬如待大  
聘時大夫之爲上介者其賓則士三人爲之介也

世佐案小聘之賓與大聘之上介皆大夫也故其禮如之三介下其卿二等也然則大國小聘五介小國一介與

右小聘

記

久無事則聘焉

註曰事謂盟會之屬

世佐案事謂與鄰國相接之事即下文所謂有故

是也或因事而聘則當及聘之期不必再聘惟久而無事則必使卿聘焉所以繼舊好而聯邦交也記但云久而不明言其年數者同方嶽之諸侯又各視其遠近親疎以為之節無定期也

右記聘期

若有故則卒聘束帛加書將命百名以上書於策不及百名書於方

註曰故謂災患及時事相告請也將猶致也名書文

也今謂之字策簡也方板也

疏曰簡據一片策是衆簡相連鄭作論語序云易詩書禮樂春秋策皆尺二寸孝經謙半之論語八寸策者三分居一又謙焉是其策之長短鄭註尚書三字一簡之文服虔註左氏云古文篆書一簡八字是一簡之字数從通解節本

朱子曰此簡之長及字数皆未詳或六經之策皆二尺四寸乃與下數合當更考之

教氏曰故猶事也此與經之所謂有言者互見爾卒已也聘者兼享而言束帛加書以書加於帛上也將命之時但稱言以達其君之書而已未必言及其故張氏曰有故如告糴乞師之類卒聘倉猝而聘不待殷聘之期也字多書於策策以衆簡編連也字少書於方一板可盡也

世佐案卒聘之義教得之張誤

主人使人與客讀諸門外

註曰受其意既聘享賓出而讀之不於內者人稠處  
嚴不得審悉主人主國君也人內史也書必璽之

疏曰內史職云凡四方之事書內史讀之故知人是  
內史也襄二十九年左傳云公如楚還及方城季武  
子取卞使公治問璽書追而與之故知此書亦璽之  
也

敖氏曰公既受書客降出公以書授宰降立乃使人  
與客讀書於廟門外必與客讀之者欲其審也不於



內讀之者客降則出矣無其節也

郝氏曰讀其書於廟門外公事使衆聞也

張氏曰讀諸門外就門外燕閒之處讀之

世佐案讀書不於廟中者以客在門外宜就之也  
是時卿大夫以下皆即位於廟中則門外乃清靜  
之所告請多是密事故就此讀之豈欲使衆共聞  
之意乎郝說過矣

客將歸使大夫以其束帛反命于館

註曰為書報也

教氏曰大夫即還玉之卿也束帛言其是即彛者加書者也以其束帛反命亦如還玉之義蓋以之為信也此一節當繼禮玉之後不見於經者以其或有或無不可必

明日君館之

註曰既報館之書問尚疾也

教氏曰此反命蓋與還玉同日而明日君館之則無

此禮者其館之之節亦可見矣

世佐案此以見反命之節在館賓前一日也

右記因事而聘

既受行出遂見宰問幾月之資

註曰資行用也古者君臣謀密草創未知所之遠近  
問行用當知多少而已

朱子曰上言與卿圖事則固已知所之矣此但言與  
宰計度資費之多寡而已註言未知所之非是

敖氏曰見宰見之於其官府也幾月之資公費也問之者欲以為私費之節度也宰制國用故問之

使者既受行日朝同位

註曰謂前夕幣之間同位者使者北面介立於左少退別於其處臣也

敖氏曰日朝每日常朝也經惟見夕幣與受命之位故記明之

郝氏曰受行日謂受命啟行日朝同位即前使者載

壇帥以受命於朝使者入衆介隨入北面東上所謂朝位也

張氏曰未受命行以前卿大夫士面位各異

世佐案此見受行之後夕幣之前每日朝位也卿大夫士尊卑有間矣至是乃同其位者示奉命而往榮辱苦樂無不共之所以一衆志也疏及郝氏張氏皆於日字絕句非常以教說為正

出祖釋輶祭酒脯乃飲酒於其側

註曰祖始也既受聘享之禮行出國門止陳車騎釋酒脯之奠於輶為行始也詩傳曰輶道祭也謂祭道路之神春秋傳曰輶涉山川然則輶山行之名也道路以險阻為難是以委土為山伏牲其上使者為輶祭酒脯祈告也卿大夫處者於是饒之飲酒於其側禮畢乘車轆之而遂行舍於近郊矣其牲犬羊可也古文輶作𨔵

疏曰凡道路之神有二在國內釋幣於行者謂平適

道路之神出國門釋奠於輶者謂山行道路之神案  
月令冬祀行鄭註云行在廟門外之西為輶壤厚二  
寸廣五尺輪四尺祀行之禮北面設主於輶上國外  
祀山行之神為輶壤大小與之同鄭註夏官大馭云  
封土為山象以菩芻棘柏為神主既祭之以車轆之  
而去喻無險難也周禮犬人掌供犬牲伏瘞亦如之  
鄭註云伏謂伏犬以王車轆之故知有伏牲其上周  
禮大馭掌馭玉路以祀及祀輶王自左馭馭下祝登

受轡彼天子禮使馭祭此大夫禮故使者自祭云其  
牲犬羊可也者犬人職所云是用犬也詩云取羝以  
軼是用羊也是犬羊各用其一未必並用之言可者  
人君有牲大夫無牲直用酒脯

敖氏曰道祭謂之軼者為既祭而以車軼之因以為  
名也釋軼者釋其所軼之物謂酒脯也既釋則人為  
神祭之如士虞禮佐食為神祭黍稷膚祝祭酒之祭  
既祭乃與同行者飲酒於其側禮畢乘車軼之而過



也

世佐案始行而祭曰祖詩云韓侯出祖是也輶輶  
壞也釋輶者舍其所祭之物於輶上也鄭註月令  
乃輶字的解又因祖行之祭皆釋奠於輶故或以  
輶為道祭之名此處祖輶並言則祖為祭名而輶  
為設祭之處不可混也註引詩傳似誤祭酒脯之  
解敖得之矣

右記使者受命將行之禮

所以朝天子圭與纁皆九寸剡上寸半厚半寸博三寸  
纁三采六等朱白蒼

註曰圭所執以為瑞節也剡上象天圓地方也雜采  
曰纁以韋衣木板飾以三色再就所以薦玉重慎也  
九寸三公之圭也

疏曰凡圭天子鎮圭公桓圭侯信圭皆博三寸厚半  
寸剡上左右各寸半唯長短依命數不同以韋衣木  
板木板大小一如玉制然後以韋衣包之大小一如

其板經云三采六等註云三色再就就即等也一采為再就三采即六等也一匝為一就三采據公侯伯

天子五采子男則二采

從句讀  
節本

孔氏曰三采六等以朱白蒼畫之再行也者案聘禮記云朝天子圭與纁皆九寸纁三采六等朱白蒼朱白蒼是也既重云朱白蒼是一采為二等相間而為六等也若五等諸侯皆一采為一就典瑞云公侯伯皆三采三就謂一采為一就故三采三就其實采別

二就三采則六等也典瑞又云子男皆二采再就二采謂朱綠也二采故二就其實采別二就二采則四等也典瑞又云瑑圭璋璧琮繅皆二采一就以覲聘此謂卿大夫每采唯一等是二采共一就也與諸侯不同其天子則典瑞云纁五采五就亦一采為一就五采故五就其實采別二就五采則十等也

朱子曰案上記只有朱白蒼三字而雜記疏所引乃重有之不知何時傳寫之誤失此三字兼其言采就

之說詳明今皆著於上覽者詳之

敖氏曰圭謂桓圭也圭與纁皆九寸但言其長同耳若其廣則玉三寸而纁蓋一尺許也剡上寸半厚半寸博三寸惟據玉而言

郝氏曰朝天子謂諸侯執圭合瑞也剡削也圭形下寬上狹下寬三寸上削寸半上居下半也

世佐案剡上寸半者謂圭長九寸上寸半削之使圓其下七寸有半自若也郝說非是九寸據桓圭

而言信圭躬圭皆長七寸

問諸侯朱綠纁八寸

註曰二采再就降於天子也於天子曰朝於諸侯曰

問記之於聘文互相備

疏曰上云三采六等此二采不云四就者臣禮與君  
禮異此二采雖與子男同但一采為一匝二采為再  
匝共四等今臣一采為一就二采共為再就是二采  
當君一采之處典瑞云瑑圭璋璧琮纁皆二采一就

以規聘亦是臣二采當君一采之處上公朝天子圭  
與纁皆九寸則自相朝亦九寸上公遣臣相問圭與  
纁皆八寸則遣臣問天子亦八寸是記於聘文互相  
備也此言八寸據上公之臣侯伯之臣則六寸子男  
之臣則四寸各下其君二等

參用通解  
句讀節本

敖氏曰此言上公聘王之纁也朱綠者纁之采也典  
瑞職曰瑑圭璋璧琮纁皆二采一就以頒聘則此朱  
綠蓋合而為一就也一就則二等矣二采當去朱而

用白蒼乃不然者為其少飾故存朱而加以綠焉亦尚文之意也上言朝玉與其纁九寸故於此但言纁而不及玉蓋省文耳玉人職云瑑圭璋八寸璧琮八寸以規聘是公之聘玉亦與纁之長同也然則侯伯聘玉與纁當六寸子男則當四寸與

世佐案註云二采再就再字誤當依典瑞作一也云降於天子者謂降於朝天子也問聘之小者而所用圭纁如此則聘亦可知故云記之於聘文互



相備也

皆玄纁繫長尺絢組

註曰采成文曰絢繫無事則以繫玉因以為飾皆用五采組上以玄下以絳為地

疏曰上文纁藉尊卑不同此之組繫尊卑一等無事謂在擯之時上下皆據垂之為上下必知上玄下絳者上玄以法天下絳以法地故也經云纁註云絳者爾雅三入赤汁為纁絳則赤也故舉絳以解纁

教氏曰皆玄纁此言所用以為纁者也朝聘之纁皆以玄纁之帛為之蓋表玄而裏纁也其表裏則皆絢以采繫者纁之繫也以絢組為之其絢亦如纁之采與纁言采繫言絢文互見也絢者蓋以采絲飾物之稱舊說以絢為畫非是語曰素以為絢兮又曰繪事後素而考工記並言畫績之事則絢非畫也明矣

郝氏曰天子諸侯纁皆玄纁繒為之繫以束纁絢采色組條也

張氏曰纁以藉玉繫以聯玉與纁組即所以飾繫者  
其質上玄下纁而又加五采之組也

世佐案皆者皆朝天子問諸侯二圭之纁也玄纁  
者帛也二圭之纁皆以玄纁之帛為之而後畫以  
三采或二采記先舉其制乃言所以為之者亦釋  
物之一例也下文絢組言於長尺之下亦然舊說  
於繫字絕句非纁必用帛者薦玉之物取其細軟  
也據此則謂以木為中幹而衣以韋者蓋出於鄭

之臆說與繫玉於纁曰繫以五色之組為之組似繩而濶長尺者繫玉之餘因垂之以為飾也上經所謂屈纁垂纁者皆謂是爾繫既用絢組則非上玄下纁可知愚之舍註而取敖說者以此

問大夫之幣俟於郊為肆又齋皮馬

註曰肆猶陳列也齋猶付也使者既受命宰夫載問大夫之禮待於郊陳之為行列至則以付之也使者初行舍於近郊幣云肆馬云齋因其宜亦互文也不

於朝付之者辟君禮也必陳列之者不夕也

疏曰知載大夫幣是宰夫者以其初宰夫官具幣故知載幣於郊付使者亦是宰夫可知

敖氏曰經於問大夫之庭實惟言皮此兼言馬是其所用亦不定也

右記朝聘玉幣

辭無常孫而說

註曰孫順也大夫使受命不受辭辭必順且說

辭多則史少則不達辭苟足以達義之至也

敖氏曰史言其文勝也論語曰文勝質則史辭以達意而已若辭當少而反多則文勝而傷於煩當多而反少則失於略而不足以達意辭苟足以達則不煩不略為得其宜故曰義之至也

張氏曰聘問之辭難豫為成說其大要在謙遜而和悅辭多則近乎史祝辭少則不足以達意苟足以達意而又不失之多修辭之義於是為主

世佐案周公謂祝雍曰達而勿多也康王曰辭尚體要孔子曰辭達而已矣又曰修辭立其誠皆千古立言之要旨也記者之言足與相發明矣

辭曰非禮也敢對曰非禮也敢

註曰辭辭不受也對答問也二者皆卒曰敢言不敢疏曰辭謂賓辭主人答謂賓答主人介則在旁曰非禮也敢

朱子曰案諸本下句末有辭字註無復出辭字永嘉

本張淳識誤曰以註疏考之經下羨一辭字註上合  
更有一辭字蓋傳寫誤以註文為經文也當依註疏  
減經以還註其說為是今從之

敖氏曰此辭對之辭未詳其所用之節姑闕之

世佐案此舉辭之少而達者以示例也辭者不受  
其禮對者不許其辭辭與對皆兼賓與主人而言  
所用之節蓋多矣朱子以此入郊勞章下今即以  
郊勞禮論之如君使卿勞賓賓禮辭是賓辭而主



國之卿對也及將僨勞者勞者禮辭是主國之卿  
辭而賓對也其他可以類推矣疏引易旅卦鄭註  
云皆是介在旁釋此辭非

右記修辭之節因及辭對二言

卿館於大夫大夫館於士士館於工商

註曰館者必於廟不館於敵者之廟為大尊也自官  
師以上有廟有寢工商則寢而已

疏曰祭法云適士二廟官師一廟鄭云官師謂中士

下士周禮隸僕鄭註云五寢五廟之寢天子七廟唯  
祧無寢蓋前曰廟後曰寢也爾雅云室有東西廂曰  
廟註云夾室前堂又云無東西廂有室曰寢註云但  
有大室自士以上有廟者必有寢庶人在官者工商  
之等有寢者則無廟故祭法云庶士庶人無廟祭於  
寢是也又曰曾子問云公館與公所為曰公館鄭註  
云公館若今縣官舍也彼是正客館彼此兩言之者  
若朝聘使少則皆於正客館若使多則有在大夫廟

從通解

節本

朱子曰疏引曾子問之文如此而下經還玉賓負右房而立是不必於廟也明矣鄭註不通當從疏說

世佐案註云必於廟者謂館於大夫士之家者必於其廟而不於寢也不於寢者嫌其褻也大夫士之家廟無右房若在正客館則有右房而無廟稱矣其說未為不合朱子譏之似失註意

管人為客三日具沐五日具浴

註曰管人掌客館者也客謂使者下及士介也

教氏曰三日五日古人平常沐浴之節也內則言子  
事父母之禮云五日則燂湯請浴三日具沐又云少  
事長賤事貴共帥時則亦足以見之矣

右記賓館

殮不致

註曰不以束帛致命草次饌殮具輕

教氏曰不致者宰夫設之而已不以君命致之也必

不致者遠辟朝君之禮也

顧氏炎武曰此即孟子所謂廩人繼粟庖人繼肉不以君命將之恐勞賓也

賓不拜

註曰以不致命

沐浴而食之

註曰自潔清尊主國君賜也記此重者沐浴可知

右記設殮

卿大夫訝大夫士訝士皆有訝

註曰卿使者大夫上介也士衆介也訝主國君所使  
迎待賓者如今使者護容

敖氏曰掌訝職云凡訝者賓客至而往詔相其事而  
掌其治令其職如是則以降等者為之宜也云士皆  
有訝者嫌其賤不必訝若上士則使中士訝之中士  
則使下士訝之也

世佐案訝即經所謂訝賓於館者周禮云凡賓客

諸侯有卿訝卿有大夫訝大夫有士訝士皆有訝  
註云此謂朝覲聘問之日王所使迎賓客於館之  
訝是也蓋訝有二一是待事於客之訝秋官掌訝  
是也以中士為之一是迎賓於館之訝此記所陳  
是也以降於賓一等者為之天子二訝俱有諸侯  
無掌訝即以大夫士迎賓於館者兼之故下文又  
言賓就館訝以公使已待事之命告賓也

賓即館訝將公命

註曰使已迎待之命

疏曰掌訝職云賓入館次於舍門外待事於客註云次如今官府門外更衣處待事於客通其所求索彼謂天子有掌訝之官共承容禮此諸侯無掌訝是以還遣所使大夫士訝將公命有事通傳於君

敖氏曰此節宜在卿致館之後將公命益於外門內也下禮同

張氏曰謂以君使已迎待之命告之於賓



世佐案賓即館謂聘享畢就館之時也教云此節宜在卿致館之後非

又見之以其摯

註曰復以私禮見者訝將舍於賓館之外宜相親也大夫訝者執鴈士訝者執雉

教氏曰言又者見其與上禮相接也訝者既將公命出奉贄以請見賓亦於門外俟之賓未將公事乃不辭其私見者以其因將公命而為之也

賓既將公事復見訝以其摯

註曰公事聘享問大夫復報也使者及上介執鴈羣  
介執雉各以見其訝

疏曰訝者彘以贄私見已今還私以贄報見之知使  
者及上介同執鴈不執羔者上文主國卿大夫勞賓  
同執鴈則此使者及上介同執鴈可知各以見其訝  
者謂使者見大夫之訝者上介見士之訝者士介亦  
見士訝者

敖氏曰其贄即訝之贄也復見之以其贄所謂還贄也卿則還鴈大夫士則皆還雉於其訝士相見禮云士見於大夫終辭其贄蓋以無復見之禮故也此亦有士見於大夫而不終辭之者以其受公命而為訝與同國之降等者異故略如敵者之禮不辭其贄而復見之也

世佐案公事問大夫也既將公事即訝見之明日也問大夫畢而後復見先公後私也必與問大夫

同日者答禮尚疾也其贄之解教得之然則上介復見訝亦以雉不以鴈者義取還贄與執贄而見者別也

右記賓訝往復之禮

凡四器者唯其所寶以聘可也

註曰言國獨以此為寶也四器謂圭璋璧琮

疏曰此據公侯伯之使者用圭璋璧琮若子男使者聘用璧琮享用琥璜

教氏曰四器者聘享及夫人之聘享共用四玉器也  
公侯伯之所寶者圭璋璧琮子男之所寶者璧琮琥  
璜言惟得用其所寶者以聘見不可用其不當用者  
也

郝氏曰唯其所寶謂擇其最重者以聘也

張氏曰四器唯其所寶故以行聘非所寶則不足以  
通誠好矣

世佐案此記聘玉之異當在所以朝天子之上文

脫在此耳圭璋璧琮玉器凡四聘享並行而聘尤重故必以其所寶者聘也云惟其所寶者五等諸侯所寶不同則所用以聘者亦異公侯伯寶圭璋子男寶璧琮上用則已僭下用則已卑皆不可也經但見公侯伯之聘玉嫌璧琮可以享而不可以聘故記明之且以杜僭與卑之失也

宗人授次次以帷少退於君之次

註曰主國之門外諸侯及卿大夫之所使者次位皆

有常處

疏曰朝聘陳賓介上公九十步侯伯七十步子男五十步使其臣聘又各降二等其次依其步數就西方而置之未行禮之時止於次中至將行禮賓乃出次

從句讀

節本

朱子曰案周禮幕人掌相會共帷幕掌次掌張幕此宗人字恐誤

教氏曰授次授賓次也設次者掌次也宗人則主授

之耳君謂朝君也云少退之則似謂在其南而少西也司儀云及將幣車進拜辱賓車進答拜云車進是朝君未嘗入於次也此乃著君之次亦似微異

世佐案次在庫門外之西南授者使賓少憇於此以俟辦也是時賓介猶未陳安得有九十步七十步五十步之限乎九十步以下是主君迎賓時南北相去之節次則又在其西少退者不敢當朝君設次之處也退退而北次南向故以近門為退敖說



非據此則朝君有次明矣司儀云賓車進者謂當  
主君出迎之時賓出次登車而進也未迎賓以前  
賓亦在次不言者文不具耳教云君未嘗入次亦  
非

右記授賓次

上介執圭如重授賓

註曰慎之也曲禮曰凡執主器執輕如不克

疏曰此謂將聘於主君廟門外上介屈纜以授賓賓

襲受之節

敖氏曰上介凡執玉皆如是不惟將聘授賓之時為然記者特於此發之耳其餘執玉者亦如之不盡見也

賓入門皇升堂讓將授志趨

註曰皇自莊盛也讓謂舉手平衡也志猶念也念趨謂審行步也孔子之執圭鞠躬如也如不勝上如揖下如授勃如戰色足跼跼如有循

疏曰賓入門皇謂未至堂時升堂讓謂升堂東面向  
主君之時將授志趨謂賓執玉向楹將授玉之時念  
鄉入門在庭時執玉徐趨今當亦然若降堂後趨進  
翼如則疾趨也

敖氏曰讓謂必後主君也經云公升二等賓升是也  
春秋傳衛孫林父聘於魯公登亦登是不讓也將授  
謂發於負序之位將授玉也行而張足曰趨曲禮曰  
堂上不趨執玉不趨特志於趨耳言其急於授君而

行速也

郝氏曰讓恭遜也對主君將以主授之志誠專一疾趨而前如爭先授惟恐遲也

張氏曰註所云審行步者謂審乎君行一臣行二之節也

世佐案此節句讀當從註疏讓與志趨之解教氏較勝郝氏好為新奇而以將授志為一句趨授如爭為一句謬甚

授如爭承下如送君還而后退

註曰爭爭鬪之爭重失隊也

疏曰授謂就東楹授玉於主君時如與人爭接取物  
恐失墜下如送者謂聘享每訖君實不送而賓之敬  
如君送然君迴還賓則退出廟門更行後事非謂賓

出大門也

從句讀  
節本

敖氏曰授如爭謂尚疾而不敢留君也承下如送謂  
既授則以手承公手之下而未即退防玉之失隊也

如送者如送客然言其未即退之意也君還東面而後賓退

張氏曰下如送當與論語下如授同解言其授玉時手容也君還謂君轉身將授玉於宰而後賓退而下階若以下為下階退為出廟門恐非文次

世佐案此節句讀當從教義爭爭戰之爭授如爭言授玉時容色論語云勃如戰色是也承下如送教得之退謂自東楹之間而退也下文方言其下

階之容則以此退為出廟門者誤矣

下階發氣怡焉再三舉足又趨

註曰發氣舍息也再三舉足自安定乃復趨也至此云舉足則志趨卷豚而行也孔子之升堂鞠躬如也屏氣似不息者出降一等遲顏色怡怡如也沒階趨進翼如也

朱子曰趨進進字行卷豚義見曲禮卷轉也豚之言若有循

教氏曰下階謂降而沒階之時也怡和悅也於此言發氣怡焉言又趨則向者之屏氣戰色足如有循可知矣趨言又者明復其常也

及門正焉

註曰容色復故此皆心變見於威儀

張氏曰出門將更行後事此皆心變見於威儀統指賓入門以下而言

執圭入門鞠躬焉如恐失之



註曰記異說也

疏曰亦謂方聘執圭入廟門時

敖氏曰鞠躬者敬也如恐失之者慎也

及享發氣焉盈容

註曰孔子之於享禮有容色

世佐案發氣與聘時下階同盈容則和氣且溢於  
而矣正行享禮之時如是聘主於敬享貴於和故  
其容貌亦異

衆介北面踰焉

註曰容貌舒揚

疏曰此謂賓行聘衆介從入門左北面

敖氏曰於享乃云踰焉以見聘時之不然也然則衆介容貌之變其節亦略與賓同矣

世佐案衆介謂自上介而下也此蒙及享之文當以敖說為正據此則享時介亦皆從入明矣

私覲愉愉焉

註曰容貌和敬

疏曰享時盛容舒於聘時之戰色私覲愉愉又舒於

盈容

從集說  
節本

出如舒鴈

註曰威儀自然而有行列舒鴈鵠也

疏曰此出廟門之外行步如鵠又舒緩於愉愉也

張氏曰兼指賓介

皇且行入門主敬升堂主慎

註曰復記執玉異說

敖氏曰主敬鞠躬也主慎如恐失之也先言皇且行乃云入門主敬則與上記入門皇者異也云升堂主慎則又與入門而如恐失之者異也是謂異說

右三記賓介聘享之容

凡庭實隨入左先皮馬相間可也

註曰隨入不並行也間猶代也土物有宜君子不以所無為禮畜獸同類可以相代

疏曰左先者以皮馬以四為禮北面以西頭為上故左先入陳也

敖氏曰皮馬相間謂庭實若相繼而兩設用皮則宜俱用皮用馬則宜俱用馬或不能然則一節用皮一節用馬相間而設亦自無害於禮故云可也可者許其得用之辭

賓之幣唯馬出其餘皆東

註曰馬出當從廐也餘物皆東藏之內府

敖氏曰賓之幣謂將聘君之幣及私覲者也馬亦言幣則幣字之所包者廣矣

多貨則傷於德

註曰貨天地所化生謂玉也君子於玉比德焉朝聘之禮以為瑞節重禮也多之則是主於貨傷敗其為德

敖氏曰貨指聘物而言聘物有常數若多用之則有重貨之意而傷害於其德矣言此者見貨之所以不

可多也

世佐案春秋傳云儉德之共也侈惡之大也若使所將之貨踰於常數則失輕財重禮之義故云傷於德貨謂玉帛庭實之屬註專指玉言非

幣美則沒禮

註曰幣人所造成以自覆幣謂束帛也愛之斯欲衣食之君子之情也是以享用幣所以副忠信美之則是主於幣而禮之本意不見也

敖氏曰美謂奇巧也聘幣有常制若美為之則過於禮而禮為之沒矣言此者見幣之所以不必美也上言貨則幣在其中矣以其出於人力之所為故復以美戒之

張氏曰註覆幣之幣疑當作蔽自覆蔽謂其可以為衣也

世佐案禮以忠信為本故幣亦以少文為貴享用帛賓上介覲用錦士介玉錦是其差矣若過為華



靡則外飾勝而忠信薄故沒禮書云儀不及物曰  
不享亦斯意也

賄在聘於賄

註曰賄財也于讀曰為言主國禮賓當視賓之聘禮  
而為之財也賓客者主人所欲豐也若苟豐之是又  
傷財也周禮曰凡諸侯之交各稱其邦而為之幣以  
其幣為之禮

郝氏曰賄在猶在賄如舜在璿璣文王世子在視寒

煖之在察也專尚財賄是聘以賄而已也鄭讀于作  
為非

張氏曰在視也賄謂賄用束紡禮用玉帛乘皮及贈  
之屬是也

世佐案此句未詳姑依註釋之郝氏欲更舊義而  
為說愈晦今不從

右記庭實貨幣之宜

凡執玉無藉者襲

註曰藉謂繅也繅所以緼藉玉

疏曰凡繅藉有二種若以木為中幹施五采三采者此繅常有不得云無藉今此云無藉者襲據尺絢組繅藉而言若廟門外賈人啟擯取玉垂繅以授上介上介裼受上介屈繅以授賓賓即襲受即此執玉無藉者是也此文與曲禮同故曲禮凡執玉其有藉者則裼無藉者則襲是也

曲禮曰執玉其有藉者則裼無藉者則襲 註曰藉

藻也裼襲文質相變耳有藻為文裼見美亦文無藻為質襲充美亦質圭璋特而襲璧琮加束帛而裼亦是也 疏曰此章之義皇氏云凡執玉之時必有其藻以承於玉若畫飾見美之時必垂纁於兩端令垂向於下謂之有藉當時所執之人則去體上外服以見在內裼衣故云有藉者則裼也其事質充美之時承玉之藻不使下垂屈而在手謂之無藉當時所執之人則

掩其上服襲蓋裼衣謂之無藉者則襲此謂執玉之人朝聘行禮或有裼時或有襲時也又云圭璋特而襲者上公享王圭以馬享后璋以皮皮馬既不上於堂其上唯特有圭璋圭璋既是寶物不可露見必以物覆襲之故云圭璋特而襲也云璧琮加束帛而裼者謂侯伯子男享天子璧以帛享后琮以錦既有帛錦承玉上唯用輕細之物蒙覆以裼之故云璧琮加束帛而裼也此明非但人有裼襲其玉亦有裼襲之

義熊氏則云采色畫韋衣版之蔘藉則常有今言無

者據不

舊本脫不字  
今從朱子補

垂之也其垂蔘之時則須褻屈

蔘之時則須襲案聘禮賓至主人廟門之外賈人東

面坐啟櫝取圭垂纁不起而授上介註云不言褻襲

者賤不褻也以賈賤故不言褻明貴者垂蔘當褻也

又云上介不襲執圭屈纁授賓註上介不襲者以盛

禮不在於已明屈纁合襲也又云賓襲執圭又云公

襲受玉於時圭皆屈纁故賓與公執玉皆襲是屈蔘

之時皆襲則所謂無藉者襲是也聘禮又云賓出公授宰玉裼降立是授玉之後乃裼也又云賓裼奉束帛加璧享是有藉者裼凡朝之與聘賓與主君行禮皆屈而襲至於行享之時皆裼也知者以聘禮行聘則襲受享則裼凡享時其玉皆無藉蒸故崔靈恩云初享圭璋特故有蒸其餘則束帛加璧既有束帛不須蒸

陳氏祥道曰玉有以縑為之藉有以束帛為之藉有

藉則褻無藉則襲特施於束帛而已聘賓襲執圭公襲受玉及享則賓褻奉束帛加璧蓋聘特用玉而其禮嚴享藉以帛而其禮殺此襲褻所以不同先儒以垂纁為有藉屈纁為無藉此說非也

陸氏佃曰無藉若圭璋特是也經言纁又別言藉則藉非纁著矣藉若璧以帛琮以錦之類所謂公降藉受玉於中堂此無藉者之玉也即束帛加璧褻矣

朱子曰鄭說兩義詞太簡略指不分明疏家所引皇



氏熊氏始以垂屈言之但熊氏所云今言無者據垂之也乃與經文及皇氏并已說上下文皆相反疑其據字之下當脫一不字今已輒為補之矣至於圭璋璧琮之義則皇氏為失而熊氏得之但周禮典瑞云璧琮纁皆二采一就而熊氏亦自謂以韋衣版之藉則皆有而又引崔靈恩云璧琮既有束帛則不須蒸似亦抵牾疑璧琮雖有蒸而屈之當為無藉特以加於束帛故從有藉之例而執之者禘耳陳氏陸氏則

全  
卷十一  
但取鄭註後說而用熊氏之義似亦有理然今未敢  
斷其是非故悉著其說以俟知者

楊氏曰纁有二種賈疏已詳然言纁又有藉者承玉  
繫玉二種皆承藉玉之義故言藉也但藉字又有一  
義曲禮云執玉其有藉者則裼無藉者則襲所謂無  
藉謂圭璋特達不加束帛當執圭璋之時其人則襲  
也所謂有藉者謂璧琮加於束帛之上當執璧琮之  
時其人則裼也曲禮所云專指圭璋特而襲璧琮加

束帛而裼一條言之先儒乃以執圭而垂纁為有藉  
執圭而屈纁為無藉此則不然陳氏陸氏之言足以  
破先儒千百載之惑矣然何以知先儒之說為非而  
陳氏陸氏之說為是耶竊詳經文裼襲是一事垂纁  
屈纁又別是一事不容混合為一說方其始受君命  
也賈人啟櫝取圭垂纁以授宰宰執圭屈纁自公左  
授使者使者垂纁受命訖以授上介上介受玉屈纁  
以授賈人是時授受凡易四手有屈垂之文而無裼

襲之禮也及至主國行聘禮賓在廟門之外賈人啟  
櫝取玉垂纁而授上介上介不襲屈纁以授賓經明  
言上介不襲是有垂屈之文而無祔襲之禮也逮夫  
主賓三揖三讓登堂賓襲執圭公側襲受玉於中堂  
與東楹之間及公側授宰玉而後祔降立是主賓授  
受則襲既授宰玉則祔故鄭註云凡當盛禮者以充  
美為敬非盛禮者以見美為敬此言是也當主賓授  
受之時曾不見垂屈之文焉聘禮既畢君使卿皮弁

還玉於館既歸反命公南鄉卿進使者使者執圭屈  
纁北面上介執璋屈纁立於其左又有垂屈之文而  
無褻襲之禮蓋圭聘禮之重也主賓授玉於中堂與  
東楹之間禮之正也方其授於賈人授於上介皆擬  
行之禮及贊禮者之事故辨垂屈以彰其文主賓授  
玉於中堂與東楹之間為禮之正故辨褻襲以致其  
敬及歸反命又於君前以垂屈為文而不以褻襲為  
禮豈非玉為聘禮設反命亦非禮之正乎兩義不同

各有其宜自鄭氏之說始差熊氏皇氏從而傳會之  
而經意始汨然經文粲然如日星之在天又豈得而  
終汨之耶

敖氏曰藉謂束帛以藉玉也以此篇考之則聘以圭  
璋而不用束帛以為藉所謂無藉者也其實主授受  
之時皆襲以執之過此則皆褻矣蓋聘玉尊當特達  
而無藉執聘玉則當加敬而襲其襲與無藉之義初  
不相通記人特因二者之異於常故合而為言耳執

玉之無藉者襲則於其有藉者裼可知乃不言之者裼乃常禮不待於執享玉之時為然故也

郝氏曰執玉謂執圭璋璧琮皆有纁承藉無藉則以衣揜手執之曰襲有藉則赤手執之曰裼

張氏曰案疏以屈纁為無藉垂纁為有藉又以纁有二種其說愈支而難通曲禮陳氏註云所謂無藉謂圭璋特達不加束帛當執圭璋之時其人則襲有藉者謂璧琮加於束帛之上當執璧琮時其人則裼

世佐

案上說見楊氏儀禮圖而禮記集說引之  
非出於陳氏澔也此作曲禮陳氏註誤 此定說也

又案曲禮鄭註亦云圭璋特而襲璧琮加束帛而裼  
疏引熊氏云朝時用圭璋特賓主俱襲行享時用璧  
琮加束帛賓主俱裼亦是也先儒已有此說亦非陳  
氏創為之也

世佐案無藉者謂圭璋也執圭璋必襲者以變為  
敬也此唯謂聘及還玉之時則然其在君前受命  
反命雖執圭璋亦不襲以其敬圭璋不加於敬君



也繅與束帛皆所以藉玉而此所謂藉則專指束帛而言鄭乃以繅釋之因此致誤然其註曲禮云圭璋特而襲璧琮加束帛而祔亦是也則亦自知其初說之非而變之矣自楊氏教氏辨後其疑始剖考之經文一一符合郝氏猶欲立異何耶又案朱綠之繅以絢組為繫本是一物賈疏強分為二非璧琮既有束帛之藉則不須繅崔氏之說是也典瑞云璧琮繅皆二采一就據子男聘用璧琮言

也若然則子男之聘也璧琮特而襲琥璜加束帛而裼與

右記裼襲之節

禮不拜至

註曰以賓不於是始至今文禮為醴

疏曰據鄉飲酒賓主升堂主人有拜至之禮此賓昨日初至之時主人請賓行禮賓言俟間此時賓已至矣故聘時不拜至

敖氏曰醴賓而不拜至其辟朝君之禮乎諸侯相朝有儻禮與醴相類鄭本作禮註曰今文禮為醴繼公謂宜從今文

郝氏曰禮通作醴賓聘享於廟畢主君醴之賓至則拜醴賓無拜至也

張氏曰禮謂聘享畢公禮賓也疏以為聘時似非經意

世佐案以鬱鬯禮朝賓曰儻以醴酒禮聘客曰醴

不拜至者朝聘之禮異於飲燕也聘時已不拜至矣於是乃著之者嫌其以醴飲賓或與飲燕同也

士昏禮醴賓主人拜至

司儀云凡諸公相為賓及將幣登再

拜授幣賓拜送幣鄭註云授當為受主人拜至且受玉也愚謂鄭誤主君再拜與此經公當楣再拜同皆為拜受非拜至也始至不拜至則儻時亦不拜至可知然則此註及教說之誤明矣

醴尊於東箱瓦大一有豐

教氏曰士冠禮醴尊於房中勺解角柶脯醢在其北  
南上此尊於東箱則勺解籩豆之類亦宜近之

郝氏曰東箱東夾室

世佐案箱廂通郝氏張氏本皆作廂瓦大豐見燕  
禮

薦脯五臠祭半臠橫之

世佐案說見鄉飲酒及鄉射記

祭醴再扱始扱一祭卒再祭

註曰卒謂後扱

主人之庭實則主人遂以出賓之士訝受之

註曰此謂餘三馬也左馬賓執以出矣

敖氏曰主人之庭實謂用於醴賓之時者也遂以出者主人之士也賓之士其從者也此文似以庭實主於皮馬而言是醴賓之庭實或皮或馬亦不定也註惟言馬者特見其一耳

右記公禮賓儀物

既覲賓若私獻奉獻將命

註曰時有珍異之物或賓奉之所以自序尊敬也猶以君命致之

疏曰臣統於君雖是私獻已物亦以君命致之故云

將命

從通解  
節本

敖氏曰玉藻曰親在行禮於人稱父此臣有獻於他國之君而稱其君命以將之亦其義也

世佐案私覲之禮或有或無故不見於經而記著

之亦於擯者出請乃將命也其辭蓋曰寡君之賜也君其以賜乎

擯者入告出禮辭

註曰辭其獻也

賓東面坐奠獻再拜稽首

註曰送獻不入者奉物禮輕

教氏曰以君命將之而奠獻於外再拜稽首見其為已物也



擯者東面坐取獻舉以入告出禮請受

註曰東面坐取獻者以宜並受也其取之由賓南而自後右客也

世佐案請受說見上

賓固辭公答再拜

註曰拜受於賓也固亦衍字

敖氏曰云答則拜非為受也凡尊者與卑者之禮而不得親受者其儀皆然公拜亦於中庭

世佐案固辭說見上介私覲章

擯者立於闕外以相拜賓辟

世佐案相拜者所立上經云門中此云闕外文互見也

擯者授宰夫於中庭

註云東藏之既乃介覲

若兄弟之國則問夫人

註曰兄弟謂同姓若婚姻甥舅有親者問猶遺也謂

獻也不言獻者變於君也非兄弟獻不及夫人

教氏曰此記似謂賓於兄弟之國必有問夫人之禮也經不言賓之私獻上記言私獻而云若則是賓於兄弟之國其主君之獻或有或無不可必也乃謂必有問夫人之禮何與是亦與上記微不相通或曰問猶聘也即經所謂夫人之聘享者也未知是否

郝氏曰兄弟之國謂同姓及與為昏姻者非是則聘問不及其夫人

世佐案問賓私問也亦行於私覲之後而其儀節  
蓋與私獻相似故記於此然與上私獻之禮不相  
蒙也兄弟之國雖不獻君亦問夫人非兄弟雖獻  
君亦不問夫人敖郝二說皆誤

右記賓私獻及問夫人

若君不見

註曰君有疾若他故不見使者

使大夫受

註曰受聘享也大夫上卿也

敖氏曰大夫亦皮弁襲迎賓於大門外不拜帥賓以入也

世佐案亦受之於廟而不筵几不言者文省也此大夫代受之禮與遭夫人世子之喪相似惟主人之服為異上註他故之中兼有哀慘之事而以純吉將事者謂輕喪也

自下聽命自西階升受負右房而立賓降亦降

註曰此儀如還圭然而賓大夫易處耳

不禮

註曰辟正主也今文禮作醴

敖氏曰鄭本作醴註曰今文禮作醴繼公謂宜從今文

世佐案監本註中脫今文禮作醴五字今從通解  
集說二本補今文之今通解作古

右記君不親受之禮

幣之所及皆勞不釋服

註曰以與賓接於君所賓又請有事於已不可以不速也所不及者下大夫未嘗使者也不勞者以先是賓請有事於已同類既聞彼為禮所及則已往有嫌也所以知及不及者賓請有事固曰某子某子

敖氏曰經云卿大夫勞賓而此云幣之所及皆勞則謂大夫時或有勞之者時或有皆不勞之者矣似異於經且以幣不及已之故而不勞賓亦恐非禮意蓋

聘君之問卿卿大夫之勞賓皆禮之當然二者初不  
相關記乃合而言之似失之矣服謂皮弁服不釋服  
之意亦未詳

郝氏曰幣之所及謂大夫以上聘君皆有問幣卿大  
夫皆勞賓祖廟行聘享畢不脫朝服即往勞賓於館  
先施責敏也

世佐案勞者卿大夫之私事以賓將有事於已而  
為之先施也下大夫未嘗使者分卑交淺其不勞



也固宜教以此記為異於經而訾其失過矣服皮弁也行聘之時卿大夫皆在廟中君臣同服既聘不脫服而往以是日尚有歸饗餼之禮不可少緩也

右記卿大夫勞賓

賜饗唯羹飪筮一尸若昭若穆

註曰羹飪謂飪一牢也肉謂之羹唯是祭其先大禮之盛者也筮尸若昭若穆容父在父在則祭祖父卒

則祭禴腥餼不祭則士介不祭也士之初行不釋幣於禴不祭可也

疏曰古者天子諸侯行載廟木主大夫雖無木主亦

以幣帛主其神是以受主國饗餼故

故疑當作必

筮尸祭

然後食之尊神以求福故也

教氏曰唯羹飪之文意不具或脫一祭字也云筮一尸者嫌并祭祖禴當異尸也并祭祖禴而唯一尸故若昭若穆者皆可尸云筮則子弟之從行者衆矣

世佐案筮一尸之義註得之教說非士介初行亦告於禰至是乃不祭者賤不載主也

僕為祝

註曰僕為祝者大夫之臣攝官也

敖氏曰僕御者也僕為祝者祝不從行故僕攝之傳載祝鮫之言曰嘉好之事君行師從卿行旅從臣無事焉然則君與大夫以嘉好之事出竟祝皆不從亦可見矣

祝曰孝孫某孝子某薦嘉禮於皇祖某甫皇考某子

敖氏曰孝孫孝子稱於祖禰之辭也禮指饗而言即所謂大禮也字祖而謚父亦假設之辭爾凡稱鬼神大夫則舉其謚士則舉其

張氏曰上文云若昭若穆故此亦兩言之

如饋食之禮

註曰如少牢饋食之禮不言少牢今以大牢也

疏曰案少牢禮有尊俎籩豆鬯敦之數陳設之儀陰

厭陽厭之禮九飯三獻之法上大夫又有正祭於室  
儻尸於堂此等皆宜有之至於致爵加爵及獻兄弟  
弟子等固當略之矣

教氏曰此如少牢饋食之禮但如其不賓尸者耳賓  
於聘日受饗且在他國則此時祭物雖多而禮儀亦  
不得不略又此用太牢亦與彼禮異者也然則所謂  
如者蓋大約言之耳

假器於大夫

註曰不敢以君之器為祭器

教氏曰必假於大夫者其禮其器與之同也

世佐案註所謂君之器謂鼎豆之屬君所歸於賓者亦是祭器而臣不敢用也

盼肉及廋車

註曰盼猶賦也廋廋人也車巾車也二人掌視車馬之官也賦及之明辨也

疏曰此謂祭訖歸胙所及廋人巾車見周禮

從儀禮圖節本

郝氏曰盼頌通分肉也

右記賓受饗而祭

聘日致饗明日問大夫

註曰不以殘日問人崇敬也

教氏曰所以下於其君亦以聘日未有暇及之也

夕夫人歸禮

註曰與君異日下之也

既致饗旬而稍宰夫始歸乘禽日如其饗餼之數

註曰稍稟食也乘謂乘行之禽也謂雁鷺之屬其歸之以雙為數其賓與上介也

敖氏曰旬日乃稍者以饗餼之物多也上賓饗餼五牢則日五雙上介三牢則日三雙士介一牢則一雙亦降殺以兩與

世佐案乘禽禽之羣居者列女傳謂睢鳩人未嘗見其乘居而匹處朱子云乘居謂四箇同居是其徵矣



士中日則二雙

註曰中猶間也不一日一雙太寡不敬也

凡獻執一雙委其餘于面

註曰執一雙以將命也面前也其受之也上介受以  
入告之士舉其餘從之賓不辭拜受於庭上介執之  
以相拜于門中乃入授人上介受亦如之士介拜受  
于門外

疏曰自上介受之至授人約私獻文云上介受亦如

之以其受饗餼之時已如賓禮故知此亦如賓也云  
士介拜受于門外者以其受餼在門外此在門外可

知從集說  
矣節本

禽羞俶獻比

註曰比放也其致之禮如乘禽也

世佐案禽羞俶獻註見上

右記賓主行禮之節次及禽獻之等級

歸大禮之日既受饗餼請觀

註曰聘於是國欲見其宗廟之好百官之富若尤尊大之焉

教氏曰歸大禮之日即聘日也是日所行之禮自聘以至於介之私覲凡十餘節以大概言之亦必至于日幾中而后畢既而又有受饗之事已受饗又以祭其祖禰如饋食之禮由是觀之則日暮人倦可知矣乃復請觀何哉且問卿之公事未舉而私為道觀亦非禮也此記必誤矣

世佐案觀者非徒謂其宗廟百官也如季札觀樂  
韓宣子觀書于太史氏之類皆是請請于歸饗餼  
之使者使之告于君君許而后訝帥以入也是日  
特請之而已猶未觀也教謂即於是日觀而疑記  
者之誤非

訝帥之自下門入

註曰帥猶道也從下門外入游觀非正也

郝氏曰由便門不由大門非公事避君也

世佐案此當在公事畢之後記終言之

右記賓觀

各以其爵朝服

註曰此句宜在凡致禮下

郝氏曰賓與上介士介各以其爵服朝服不敢褻服  
入也

世佐案此謂君所使致禮者也其謂賓與上介也  
致賓以卿致上介以下大夫朝服殺於致饗也郝

以此句屬上節則各以其爵四字不可通矣

右記致禮錯簡

士無饗無饗者無擯

註曰謂歸餼也

李氏寶之曰擯當作儼

右記士介之殺禮

大夫不敢辭君初為之辭矣

註曰此句宜在明日問大夫之下

疏曰此謂賓問卿之時卿不敢辭者以賓聘享訖出大門請有事於大夫君禮辭許是君初為之辭故卿不辭也

敖氏曰此上蓋有關文

世佐案以經文之次考之此節正當在歸士介餼之後並非闕文錯簡

凡致禮皆用其饗之加籩豆

註曰凡致禮謂君不親饗賓及上介以酌幣致其禮

也其其實與上介也加籩豆謂其實也亦實於饗筐  
饗禮今亡

疏曰案上經賓介皆有食饗唯士介不言故知其中

唯有賓與上介

從通解  
節本

敖氏曰春秋傳晉侯享季武子有加籩武子辭韓宣  
子曰寡君以為驩也是籩豆之加與否已定於未饗  
之先若不親饗而歸之嫌加者不致故云然

世佐案凡凡致享與食也禮兼享食而言下唯言



享者舉此以見彼也食有加饌亦致之可知註云亦實於甕篚者約公食大夫禮言也豆實於甕簋實於篚

無饗者無饗禮

註曰士介無享禮

世佐案唯云無享禮則主君所以待士介者食禮益有之矣經不著之者或食或否唯君所欲與

右記不親饗食與無饗

凡餼大夫黍梁稷筐五斛

註曰謂大夫餼賓上介也器寡而大略

疏曰君歸饗餼於賓與大夫介筥米小而多者是尊者所致以多器為榮今大夫致禮於賓介器寡而大是略之於卑者也

敖氏曰凡凡賓上介及士介也經云大夫餼賓上介米八筐士介米六筐而此云黍梁稷則是皆不用稻矣八筐者二黍二梁四稷也六筐者二黍二梁二稷

也其器既異於君器又多寡相懸且不敢與君同用  
四種皆所以遠下之

右記大夫餼賓介之實與器

既將公事賓請歸

註曰謂已問大夫事畢請歸不敢自專謙也主國留  
之饗食燕獻無日數盡殷勤也

凡賓拜於朝訝聽之

註曰拜拜賜也唯稍不拜

右記賓請歸及拜賜

燕則上介為賓賓為苟敬

註曰饗食君親為主尊賓也燕私樂之禮崇思殺敬也

敖氏曰饗食之禮君親為主故以賓為賓尊賓也君與臣燕則宰夫為獻主故不以賓為賓而以為苟敬亦尊賓也

世佐案說見燕禮記

宰夫獻

註曰為主人代公獻

敖氏曰燕禮輕故君與臣燕則不親為主而使宰夫獻所以明君臣之義也此與他國之臣燕亦用此禮者所以別於其君也

世佐案君不親獻者殺於饗食且以別於待朝君也

右記燕賓之禮

無行則重賄反幣

註曰無行謂獨來復無所之也必重其賄與反幣者  
使者歸以得禮多為榮所以盈聘君之意也反幣謂  
禮玉束帛乘皮所以報聘君之享禮也昔秦康公使  
西乞術聘於魯辭孫而說襄仲曰不有君子其能國  
乎厚賄之此謂重賄反幣者也

疏曰此特來非歷聘歷聘則吳公子札聘於上國是  
也

教氏曰於反幣之外又重賄之答其特來之厚意也  
即贈幣也贈幣為報其私覲故云反必言反幣者嫌  
重賄則不必贈也

世佐案賄主君所以遺聘君者上經賄止用束紡  
今則加厚之反幣謂禮玉也上經禮玉用束帛乘  
皮而已今則盡反其享君享夫人之物也重賄而  
又盡反其幣皆所以答其特來之厚意教以贈幣  
釋之非

右記特聘宜加禮

曰子以君命在寡君寡君拜君命之辱

註曰此贊君拜聘享辭也在存也

疏曰此及下三節即上經公館賓賓辟時公皆再拜  
之四事此其贊拜之辭也

從句讀  
節本

君以社稷故在寡小君拜

註曰此贊拜夫人聘享辭也言君以社稷故者夫人  
與君體敵不敢當其惠也其卒亦曰寡君拜命之辱



世佐案拜夫人之聘享而云以社稷故者夫人與君同主社稷故其辭鄭重如此若曰君既寡君延及寡小君是以主君當其惠矣註云夫人與君體敵不敢當其惠者對下拜問大夫之辭而言大夫與君不敵故敢當其惠也

君既寡君延及二三老拜

註曰此贊拜問大夫之辭既賜也大夫曰老

張氏監本正誤云君既寡君延及二三老拜又拜送

誤以又拜送句倒置君既句之上

世佐案教本與監本同郝本及謝子祥所刊儀禮本經皆同張本今以文次考之定從張氏

又拜送

註曰拜送賓也其辭蓋云子將有行寡君敢拜送此宜承上君館之下

世佐案註云此宜承上君館之下者謂自曰子以君命在寡君至此皆當承上記明日君館之之下

也朱子通解僅以又拜送句入公館賓章似非註  
意又案以經文之次考之公館賓拜四事在還玉  
報享之後記之於此正與經合註說亦未為得也

右記公館賓拜四事之辭

賓於館堂楹間釋四皮束帛賓不致主人不拜

註曰賓將遂去是館留禮以禮主人所以謝之不致  
不拜不以將別崇新敬也

敖氏曰必釋於此者明為館故也皮亦在堂禮之變

也不致不拜者賓主各有當為主人之嫌難乎其為授受也不用錦而帛不授受無嫌於君禮

世佐案不致不拜之義註及教說皆未安賓不致者以主人將不答也不答而致之又嫌於僦舍也不致則不拜是亦禮之相因者於賓之去也主人乃收之

右記賓將去留謝館主人

大夫來使無罪饗之

註曰樂與嘉賓為禮

敖氏曰無罪謂無失誤也饗之親饗之也主國君於賓有饗食燕之禮但言饗者舉其盛者言之也云來使者與下文所謂過者相對立文也

郝氏曰大夫來使謂外國大夫其君有事使來非專為聘耳罪謂得罪如魯衛鄭得罪於晉執其大夫是有罪也則無饗禮無罪謂以好會或謝罪來雖非聘必饗之

世佐案來使謂聘問也大夫來使而饗之禮之常也云無罪者對下所謂過者立文也記著此條所以勉人為高行之意教及郝說皆失之

過則餼之

註曰餼之生致其牢禮也其致之辭不云君之有故耳聘義曰使者聘而誤主君不親饗食所以愧厲之也不言罪者罪將執之

敖氏曰謂假道而過者則餼之也過即經所謂過邦

餼即經所謂餼之以其禮復記於此者蒙無罪之文也若有不假道與不禁侵掠之類是其罪矣

張氏曰君有故亦不親饗此以使者有過不饗故致辭異也

世佐案過謂失誤也當以註說為正

其介為介

註曰饗賓有介者賓尊行敵禮也

疏曰饗賓於廟之時還以聘之上介為介上經云上

介一食一饗則是從賓為介之外復別饗也

從句讀節本

敖氏曰此上當言饗賓之禮乃及此耳其亦有闕文與饗賓君為主人故以賓為賓而上介為介若饗上介則上介為賓而無介小聘使下大夫其饗禮亦如之蓋士介賤不可以與主君為禮故也

郝氏曰此享大夫使者之禮也大夫為賓則其介仍為介異於聘之以介為賓以大夫為苟敬也

世佐案此句當承無罪饗之之下敖云上有闕文



非郝說尤誤

有大客後至則先客不饗食致之

註曰卑不與尊齊禮

教氏曰大客謂朝君

郝氏曰有大客謂有大國賓後至則先客為小以饗  
食致先客而親享大客隆殺之等也

世佐案大客謂大國之卿大夫來使者其隆殺之  
差詳見成三年左傳臧宣叔對公語若皆敵國也

則以聘者為大客問者為小客言此則有朝君後  
至其所以待先客者更可知矣

右記饗不饗之宜

唯大聘有几筵

註曰謂受聘享時也小聘輕雖受於廟不為神位

右記受聘問之異

十斗曰斛十六斗曰藪十藪曰秉

註曰秉十六斛今江淮之間量名有為藪者今文藪

為逾

二百四十斗

註曰謂一車之米秉有五藪

張氏曰致饗時每車米數

四秉曰筥

註曰此秉謂刈禾盈手之秉也筥穢名也若今萊陽之間刈稻聚把有名為筥者詩云彼有遺秉又云此有不斂穢


十筥曰稷十稷曰秬四百秉為一秬

註曰一車之禾三秬為千二百秉三百筥三十稷也  
張氏曰致饗時禾三十車車三秬此其秉數

右記致饗米禾之數

熊氏朋來曰聘禮篇末執圭如重入門鞠躬私覲愉  
愉等語未知鄉黨用聘禮語抑聘禮用鄉黨語大抵  
禮經多出於七十子之徒所傳案朱子鄉黨集註引  
晁氏曰定公九年孔子仕魯至十三年適齊其間無

朝聘之事疑使擯執圭二條但孔子嘗言其禮如此  
又引蘇氏曰孔子遺書雜記曲禮非必孔子事也見  
得古有儀禮之書聖門因記其語



儀禮集編卷十八